

四庫全書

子部

欽定四庫全書

子部
冊府元龜卷五百
七十三至
七十三

詳校官中書臣朱文翰

侍讀臣孫球覆勘

總校官庶吉士臣何思鈞

校對官中書臣金光悌

謄錄監生臣蔣如燕

欽定四庫全書

冊府元龜卷五百七十

宋王欽若等撰

掌禮部

作樂

夷樂

作樂第六

梁太祖開平元年既受唐禪始建宗廟凡四室母室有
登歌酌獻之舞肅宗宣元皇帝室曰來儀之舞烈祖文
穆皇帝室曰昭德之舞

二年正月太祖將議郊禋有司撰進樂名舞名樂曰慶和之樂舞曰崇德之舞皇帝行奏慶順之曲奠玉幣登歌奏慶平之曲迎俎奏慶肅之曲酌獻奏慶熙之曲飲福酒奏慶隆之曲送文舞迎武舞奏慶融之曲亞獻終獻奏慶休之曲太廟迎神舞開平之舞

後唐莊宗同光二年正月將有事於南郊光祿大夫簡校尚書左僕射行太常卿充南郊禮儀使李燕進太廟登歌樂章洎舞名其懿祖昭烈皇帝室登歌酌獻曰昭

德之舞獻祖文皇帝室登歌酌獻曰文明之舞太祖武
皇帝室登歌酌獻曰應天之舞昭宗皇帝室登歌酌獻
曰永平之舞從之

明宗天成元年八月太常定莊宗廟堂酌獻奏舞武成
之舞

四年二月詔樂章有霓裳曲名與德祖孝成皇帝廟諱
同改為雲裳曲

長興三年九月壬辰宴羣臣於長春殿教坊進新曲是

日奏畢賜名曰長興樂

末帝清泰元年五月太常卿盧文紀言明宗皇帝祔廟
其一室酌獻舞曲歌辭臣請名雍熙之舞從之

晉高祖天福元年即位

臣欽若等按五代史天福二年三月追尊四親廟而不載樂章

四年十二月庚戌禮官奏歲正旦王公上壽皇帝舉酒
奏玄同之樂再飲三飲並奏文通之樂三飲訖羣臣再
拜樂奏大同麩賓之鐘左右皆應

是月壬戌又奏正旦上壽宮懸歌舞未全

且請雜用九部雅樂
歌教坊法曲從之

五年八月詳定院奏先奉詔正冬二節朝會舊儀廢於
離亂之時興自和平之代將期備物全繫用心須議擇
人同為定制其正冬朝會禮節樂章二舞行列等事宜
差太常卿崔悅御史中丞竇貞固刑部侍郎呂錡禮部
侍郎張允與太常等官一一詳定禮從新意道在舊章
庶知治世之和漸見移風之善今衆官簡討典禮具述
制度按禮云天子以德為車以樂為御大樂與天地同
和大禮與天地同節又曰安上治人莫善於禮移風易

俗莫善於樂故樂書議舞曰夫樂在耳曰聲在目曰容
聲應乎耳可以聽知容藏於心難以貌覩故聖人假干
戚羽旄以表其容發揚蹈厲以見其意聲和合則大樂
備矣又按義鏡問鼓吹十二案合於何所答云周禮鼓
人掌六鼓四金漢朝乃有黃門鼓吹崔豹古今註云因
張騫使西域得摩訶兜勒一曲李延年增之分為二十
八曲梁置鼓吹清商令二人唐又有柷鼓金鉦大鼓長
鳴歌簫笳笛合為鼓吹十二按大享會則設於懸外此

乃是設二舞及鼓吹十二按之繇也今議一從令式排列教習文舞郎六十四人分為八佾每八佾人左手執籥禮云箒籥伊耆氏之樂也周禮有籥師教國子爾雅曰籥如笛三孔而短大者七孔謂之篴歷代以來文舞所用凡用籥六十有四右手執翟周禮所謂羽舞也書云舞干羽於兩階翟山雉羽分析連攢而為之二人執纛前引數於舞者之外舞者冠進賢冠服黃紗袍白紗中單白領標白練褹襜白布大口袴革帶烏皮履白布

襍武舞郎六十四人分為八佾左手執干干楯也今之防牌所以翳身也其色赤中畫獸形故謂之朱干周禮所謂兵舞取其武象周楯六十有四右手執戚戚斧也上飾以玉故謂之玉戚二人執旌前引旌似旗而小絳色畫昇龍二人執鼗鼓二人執鐸周禮有四金之奏其三日金鐸以通鼓形如大鈴仰而振之金鐸二每鐸二人舉之一人奏之周禮四金之奏一曰金錡以和鼓銅鑄為之其色玄其形圓若椎上大下小高三尺六寸有

六分圓二尺四寸上有伏虎之狀旁有耳獸形銜環二人執鐃以次之周禮四金之奏二曰金鐃以止鼓如鈴無舌槌柄以鳴之二人掌相在左禮云理亂以相制如小鼓用皮為表實之以糠撫之以節樂二人掌雅在右禮云訊疾以雅以木為之狀如漆角而揜口大二圍長五尺六寸以羖皮鞞之旁有二細髹畫賓醉而出以器築地明行不失節武舞人服弁手尚幘金支緋絲布大袖緋絲竹布衱襠甲金飾白練襍襠錦騰蛇起梁帶豹

文大口布袴烏皮靴工人二十數於舞人之外舞弁朱
構革帶烏皮履白練襍襜白布鞮殿庭仍如鼓吹十二
按義鏡云帝設氍毹按以氍毹為床也今請制大床容九人
振作歌樂其床為熊羆驅豹騰倚之狀以承之象百獸
率舞之意分置於建鼓之外各三按每按羽葆鼓一大
鼓一金鐃一歌二人簫二人笳二人十二按樂工一百
有八人舞助一百三十有二人取年十五已上弱冠已
下容止端正者其歌曲名號樂章詞句中書條奏差官

修撰從之

十一月冬至帝受朝於崇元殿王公上壽列二舞於樂
懸之北舉觴奏玄同之樂三爵奏文同之樂帝舉食文
武歌昭德之舞又歌成功之舞上舉四爵登歌作羣臣
飲懸下樂作又奏龜茲樂一部以俟食畢

時以二舞久廢自此復興

樂工舞人多取教坊伶官充用其歌聲靡曼抗墜端折
舞容綴兆屈伸俯仰動作皆合節無離謾遲速之累及
龜茲樂終乃奏霓裳法曲朝士咸以官舞奕舞所謂雅
部而鄭衛之音更奏其內甚非禮也其後樂司自名一
舞即及音聲人多出市井之徒限六十日教習教習未
畢會正旦上壽登歌登聲則悲離煩慙如瑾露虞殞之

音其舞進退不成。祿蹈厲不應。方識者皆曰。歌舞所以
遵德禮樂。所以觀政。今大失其序。無如成之節。季札無
譏者。此近之矣。故其年駕幸鄴。都安從進。安重榮皆興
兵向闕。明年高祖晏駕。次年契丹入寇。至哉。吉凶形兆
之於樂也。昭昭然其
若是其可不重乎。

少帝以天福七年即位。禮儀使奏奉勅。換高祖皇帝祔
饗太廟。酌獻樂章舞名。伏請以咸和之舞為名者。勅恭
依典禮。

開運二年。太常丞劉渙上表曰。伏以古今所重。禮樂為
先。禮者安上治民。樂者祭天祀地。禮樂和則陰陽順。陰

陽順則災禍銷故禮云天下大定然後正六律和五聲
又云功成作樂治定制禮乃知禮不可不興樂不可不
正臣伏自忝昇禮寺竊見全少樂工或冬正御殿或郊
廟陳儀則旋差京府衙門樂官權充每差到雖曾按習
且臨時未免生疎兼又各業胡部音聲不閑太常歌曲
有期叅雜慮失恭虔伏乞聖慈宣下所司量支請給據
數見闕樂師添召便令在寺舊人依古制教習並須精
研方可備於懸稱為樂府薦於天地和其神人使八音

以克諧期百獸而率舞魚獲昭感永福生靈勅宜令太
常寺除見管兩京雅樂節級樂官四十人外更添六十
人內三十八人宜抽教坊貼部樂官兼充餘二十二
人宜令本寺招召充填教習仍令三司定支春冬衣及月
糧聞奏其舊管四十人亦令量支添請給其年中書舍
人陶穀奏曰臣前任太常少卿伏見本寺見管二舞郎
皆坊市大戶州縣居民若不盡免差徭無緣投名鼓舞
竊以制禮作樂國家大事非造次可為也古者百獸率

舞鳳凰來儀非他也樂之至和所致今宮懸之內有琴瑟簫竽之屬豈惟樂器不堪兼且樂工不曉每至御殿但執之而已樂既無聲舞將奚用非擊石拊石手舞足蹈之義也進作象功之事且僅厚誣退思治世之音不應如是方今戎車尚駕武備猶嚴士農工商咸供力役獨此舞者無所取裁况正殿會朝已久停罷其見管見數等每有身亡皆是旋填補既不曾教習但虛免差徭伏乞聖明且議停廢俟三邊寧靜五稼豐登然後集會

禮官叅酌故事先調律呂俾無滯澁之音次授于旌畫去婆娑之態庶於昭代不墜中和勅曰樂工且令教習

舞郎權且停廢

議者曰高祖以雅樂久墮而興之嗣主以舞人為病輟之降神和人其制既亡

羊亡禮廢於義何在教習可也寢停非也

漢高祖即位稱天福十二年是年閏七月追立六廟制定太廟六室奠獻樂章舞名吏部侍郎權判太常卿張昭議曰臣聞先王作樂崇德所以殷薦上帝嚴配祖宗是明大夏雲門本匪自娛而至空桑雷鼓爰因孝享而

興自邃古以來施於郊廟至我太祖高皇帝始定天下
詔叔孫通定禮樂通始為廟樂有降神納俎登歌薦裸
等曲孝景皇帝以高皇帝有創業大功及神主祔廟帝
親奠獻及作武德之舞以歌詠高帝之功自是繼文之
君祔廟之時特為舞曲前朝祭祀降神用文舞送神用
武舞其登歌俎又即奏十二和之樂唯酌獻一曲每室
別立舞名今六祖在天四懸將奏合神酌獻之舞仰詠
積累之功臣實芻蕘不置鐘律獲備擬倫之職敢竭愚

鄙之誠恭以太祖皇帝創業垂統翼子貽孫洪唯藝祖
神宗平揖放勛文命按孝景皇帝詔曰祖有功而宗有
德制禮作樂各有其繇歌者所以發德舞者所以明功
高廟酌獻可奏武德之舞太祖高皇帝室酌獻請依舊
奏武德之舞歌用無射宮調世祖光武皇帝力攘大憝
再造丕基軒臺未泯於餘威衢室仍歌於盛德按東平
王蒼奏議曰漢制宗廟名皆不相襲以明功德光武皇
帝受命中興撥亂反正武暢方外震服百蠻功德巍巍

比隆前代夫歌以詠德舞以象功世祖廟樂宜曰大武
之舞時有制可之今世祖光武皇帝廟室酌獻請依舊
奏大武之舞歌用黃鐘宮調恭以文祖明元皇帝濬發
運源肇興洪業再啟斬蛇之運諒繫吞驚之祥恩斯勤
斯至矣美矣遺德已喧於絃誦展誠復播於聲詩文祖
明元皇帝室酌獻請奏靈長之舞歌用黃鐘宮調恭以
德祖恭僖皇帝若木分暉春山寫潤家門忠厚早彰虛
革之仁邦族顧瞻共仰籬桑之末即時謳詠猶在管絃

虔奉几筵宜光綴兆德祖恭僖皇帝室酌獻請奏即善
之舞歌用黃鐘宮調恭以翼祖昭獻皇帝胙土開家分
圭懋寵賢豪改觀咸驚白水之圖書歷數將歸共指黃
星之分野業勤昧旦義感殊隣魯戈之却日如存幽籥
之舊風安在式宗明祀用廣德音翼祖昭獻皇帝室酌
獻請奏顯仁之舞歌用太簇宮調恭以顯祖章聖皇帝
當壁象賢藏符繼業藉累葉之繁祉構興邦之永圖道
濟續隆恩深顧復既祗見於天地將對越於靈祗式詠

休勲茂昭玄貺顯祖章聖皇帝室酌獻請奏章慶之舞
歌用姑洗宮調

九月權判太常卿張昭上議曰臣聞歌以詠德舞以象
功必於開勅之時便定聲詩制蓋以鋪舒文教宣暢武
經觀舜帝簫韶則揖讓之儀可見覩周家大武則蹈厲
之世如存儻無夔夔練管紘且調鍾律何以顯文祖受終
之迹紀盟津誓衆之年是以王者功成必須有作伏惟
皇帝陛下身為律度罔恣協荃英倦聞卧聽之音思奏無

邪之頌將欲配祖宗於清廟禮天地於圓丘是以正八
佾之羽旄考四廂之金石俾其合叙靡至奪倫臣謬以
菲才暫司樂職周朝用六代之舞粗識旨歸秦帝改五
行之歌頗詳沿革今宮懸一部歷代雅音其登歌象舞
之詩孝享嚴禋之用調須合度奏亦有倫近日改更率
違根本徒呈章句之學安論制作之繇臣謹詳按舊章
發揮新意不改旋宮之義別為雅樂之名翼自我朝以
為定制又義改二舞名曰昔周公相成王制禮殿庭遍

奏六代舞所謂雲門大咸大韶大夏大濩大武也周室
既衰王綱不振諸樂皆廢惟大韶大武二曲存焉秦漢
以來名為二舞文舞韶也武舞武也漢時改為文始五
行之舞歷代因而不改貞觀作樂之時祖孝孫改隋文
舞為治康之舞武舞為凱安之舞貞觀中有秦王破陣
樂功成慶善樂二舞樂府又用為二舞是舞有四焉前
朝行用年深不可遽廢俟國家偃息靈臺即別召工師
更其節奏今且改其名具書如右祖孝孫所定二舞曰

治康之舞請改為治安之舞

取禮治世之音安以樂義

武舞曰凱安

之舞請改為振德之舞

取振旅士德之義

貞觀中二舞名文舞

功成慶善樂前朝名為九功舞請改為觀象之舞

取易君子

居則觀其象義

武舞秦王破陣樂前朝名為七德舞請改為講

功之舞

取講武策勲義

其治安振德二舞請依舊郊廟行用以

文舞降神武舞送神其觀象講功二舞請依舊宴會行

用請改十二和樂昔周朝奏六代之樂即今二舞之類

是也其實祭嘗用別有九夏之樂即肆夏皇夏等名是

也梁武帝善音樂改九夏為十二雅前朝祖孝孫改雅為和示不相沿也臣今改為成取韶樂九成之義十二成樂曲名祭天神奏豫和之樂請改為禋成之樂祭地祇奏順和請改為順成祭宗廟奏永和請改為裕成祭天地宗廟登歌奏肅和請改為肅成皇帝臨軒奏太和請改為政成王公出入奏舒和請改為弼成皇帝食舉及飲宴奏休和請改為德成皇帝受朝皇后入宮奏正和請改為展成皇太子軒懸出入奏成和請改為喬成

元日冬至皇禮會登歌奏昭和請改為慶成郊廟俎入
奏雍和請改為駢成皇帝祭享酌獻讀祝文及飲福受
胙奏壽和請改為壽成祖孝孫原定十二和曲開元朝
又奏三和遂有十五和之名凡制作禮法動依典故梁
置十二雅蓋取十二天之成數契八音十二律之變軌
益以三和有乖稽古又緣祠祭所用不可盡去臣取其
一焉祭孔宣父齊太公廟降神奏宣和請改師雅之樂
三公升殿會訖下階履行奏祓和請廢同用弼成享先

農耕籍田奏豐和請廢同用順成

隱帝乾祐元年七月禮儀使張昭上高祖廟奠獻舞曲
名并歌調表曰臣聞書稱舜禹之歌詩載商周之頌蓋
示清廟貽謀之本表玄王創業之難固宜播在謳誼被
之絃管永煥斷鼇之迹式彰伐鼓之勤伏惟高祖睿文
聖武昭肅孝皇帝龍躍唐郊龜謀代邸應黃星而恢帝
緒彌青犢以正乾綱爰在出潛備經歷試逐陰山之醜
類令振北門持分陝之權衡化流南國大勲允集駿命

攸歸旄頭落而外敵亡蜀井燃而漢圖霸大驅漣酪重
滌寰瀛按稷嗣之舊儀遵未央之故事祇見天地朝拜
寢園誓帶礪以賞功臣儼環璫而酬佐命比昭烈之雄
玉壘寄奴之王金陵瞻彼一隅寧光二祖湛湛清雒我
我德陽上林之仆柳重芳南頓之嘉禾再茂洪惟聖考
無忝神宗黎民方慶其削平仙馭奄辭於顧復今則蚩
開畢陌龍去鼎湖九虞之尸祝虛陳三后之衣冠已祔
宗牙設簾萬舞盈庭覩總干山立之人如觀牧野聽夏

籥序興之韻似宴橫汾象功之舞雖陳詠德之歌仍缺
昔秦王破陣周帝降成而猶寫在宮商形於綴兆聖作
物覩夫何讓焉臣載考聲詩恭詳典禮書曰七世之廟
可以觀德高祖皇帝廟室奠獻舞曲請以觀德為名

周太祖廣順元年五月丙子太常卿邊蔚上太廟四室
奠獻舞詞表曰臣聞禮莫尊於明祀孝莫重於奉先歷
觀哲王必嚴清廟所以二簋可用陳於羲易之中百世
不遷著在周詩之內既修祀典爰奏樂章忘濫之音不

可以致來格踴躍之貌不可以達至誠是宜詳按舊規發揚新號庶正動容之列永符觀德之文自西漢之初詔叔孫通重定禮樂始有廟樂及降祖納俎登歌薦裸等曲迨至唐朝降神用文舞送神用武舞其餘即奏十二和之樂每室酌獻一曲則別立舞名降及前朝亦詢此制今者將新郊廟嚴配祖宗合更率舞之名仰詠累功之盛恭惟信祖睿和皇帝天輔其德岳降其神源發崑丘九曲遐通於溟渤日騰陽谷四方咸仰於貞明大

志克伸嘉猷永播肇屬登三之運爰尊得一之名蒸嘗
既達於孝誠綴兆難從於舊式信祖睿和皇帝室酌獻
請奏肅雍之舞恭惟僖祖明憲皇帝茂著王公善修世
德龍蟠大澤動施雷雨之恩鳳舞高岡上絕雲霓之勢
爰符廣運式薦鴻名豆邊方備於祭儀干戚雜陳於舞
位僖祖明憲皇帝室酌獻請奏章德之舞恭惟義祖翼
順皇帝善馭英豪允兼文武雄心莫測吞七澤於胃中
戎畧素深運三宮於掌內蓋有貽孫之慶遂資啟帝之

祥遺音廣備於詠歌盛禮克昭於禋祀義祖翼順皇帝
室酌獻請奏善慶之舞恭惟慶祖章肅皇帝英華發外
清明在躬龍德終潛莫契飛天之義龜書不出孰為受
命之符大功昔啟於霸圖景命今鍾於聖緒遂正居尊
之號以伸念始之情仍舉象功更符章德慶祖章肅皇
帝室酌獻請奏觀成之舞

七月太常卿邊蔚上言王者誕膺駿命光啟皇圖應天
順人之期時聞有異制禮作樂之道理亦同歸所以堯

作大章周為大武克表欽明之運爰形蹈厲之容歷代
而然舊章斯在伏惟皇帝陛下上承帝祉下感人心必
修逸禮而秩無文執古道而御今有朱絃寶瑟將觀清
廟之登歌方澤圓丘欲祀二儀而展禮爰詔執事俾易
舊章庶成雅頌之聲仰達神明之德臣學窺周孔職嗣
夷夔諧虞庭之八音未觀率舞審姬朝之六奏微辨象
成輒變大予以明光宅所議改舞名遠自秦漢下洎隋
唐六代之舞不全四懸之器徒在陳周之後唯有大韶

大舞之曲歷代相沿以為二舞祖孝孫曰文舞曰治康
武舞曰凱安貞觀中復有功成慶善樂為九功舞秦王
破陣樂為七德舞近朝多故舞位虛陳雖未至於盡亡
實罕明於述作俟五兵不試九序載歌特委名臣重修
盛禮使朱干玉戚無差綴兆之容大夏雲門復振鏗鏘
之韻臣今沿革止異名言具修如別前朝改祖孝孫所
定二舞名文舞曰治安之舞武舞曰振德之舞今請改
治安為政和之舞振德為善勝之舞前朝改貞觀中二

舞名文舞曰觀象之舞武舞曰講功之舞今請改觀象
為崇德之舞講功為象成之舞又議改十二成在昔周
邦善行古道奏六代之樂則大章大濩之倫列九夏之
名乃皇夏肆夏之類及至梁室為十二雅之樂唐朝改
雅為和前朝改和為成皆用殊時之制臣今改成為順
十二順樂曲名祭天神奏裡成請改為昭順之樂祭地
祇奏順成請改為寧順之樂祭宗廟奏裕成請改為肅
順之樂祭天地宗廟登歌奏肅成請改為感順之樂皇

帝臨軒奏政成請改為治順之樂王公出入奏弼成請
改為忠順之樂皇帝食舉奏德成請改為康順之樂皇
帝受朝皇后入宮奏辰成請改為雍順之樂皇太子軒
懸出入奏喬成請改為溫順之樂元日冬至皇帝禮會
登歌奏慶成請改為禮順之樂郊廟俎入奏駢成請改
為裡順之樂皇帝祭享酌獻讀祝及飲福受胙奏壽成
請改為福順之樂梁武帝改九夏為十二雅以協陽律
陰呂十二管旋相之義祖孝孫改為十二和開元中乃

益三和前朝去三和改一雅臣今以為名既異時作宜
稽古今去其雅只用十二順之曲祭孔宣父齊太公廟
降神奏師雅請同用禮順之樂三公升殿會訖下階履
行同用弼成請同用忠順之樂享先農及籍田同用順
成請同用寧順之樂正冬仗公卿入並奏忠順之樂皇
帝坐奏治順之曲皇帝舉爵奏康順之曲羣臣會畢降
階奏忠順之曲公卿獻壽奏福順之曲公卿出奏忠順
之曲皇帝謁太廟用樂歌詞降神用文舞奏肅順之曲

皇帝行奏治順之曲登歌酌獻奏感順之曲迎俎奏禋
順之曲皇帝飲福奏福順之曲送文舞出迎武舞入奏
忠順之曲武舞奏善勝之曲徹俎奏肅順之曲送神奏
肅順之曲皇帝南郊大禮歌祠降神用文舞奏昭順之
曲皇帝行奏治順之曲登歌奠玉幣奏感順之曲迎俎
奏禋順之曲皇帝初獻奏福順之曲亞獻同奏福順之
曲皇帝飲福奏福順之曲送神文舞出迎武舞入奏忠
順之曲武舞奏善勝之曲送神奏昭順之曲

世宗顯德元年即位有司上太祖廟室酌獻奏明德之舞

五年六月命中書舍人竇儼叅詳太常雅樂十一月翰林學士竇儼上疏論禮樂刑政之源其一曰請依唐會要所分門類上自五帝迄于聖朝凡所施為悉命編次凡闕禮樂無有闕漏名之曰大周通禮裨禮院掌之其二曰伏請博通之士上自五帝迄于聖朝凡樂章沿革總次編錄繫于歷代樂錄之後永為定式名之曰大周

正樂俾樂寺掌之依文教習務在齊肅詔曰竇儼所上封章陳備政要舉當今之急務疾近世之因循器識可嘉辭理甚當故能立事無愧莅官所請編集大周通禮大周正樂宜依仍令於內外職官前資前名中選擇文學之士同共編集具名以聞委儼總領其事所須紙筆下有司供給

六年正月樞密使王朴上疏云臣聞禮以簡形樂以治心禮樂者聖人之大教也形體順於外心氣和於內而

不治者未之有也故理定必制禮功成必作樂一人作
之於上萬人化之於下政令不嚴功力不勞而天下理
者禮樂也行政者禮也成禮者樂也故聖人盡心焉夫
樂作於人心成聲於物聲樂既和反感於人心者也所
假之物大小有數九者成數也是以皇帝吹九寸之管
得黃鐘之聲為樂之端也半之清聲也倍之緩聲也三
分其一次損益之相生之聲也十二變而復黃鐘聲之
總數也乃命之曰十二律旋迭為均均有七調合八十

四調播之於八音著之於歌頌將以奉天地事祖宗和君臣接賓旅恢政教厚風俗以其功德之形容告於神明俾百代之後知邦國之所繇興風教之所繇行者也宗周而上率繇斯道自秦而下旋宮聲廢洎東漢雖有太子丞鮑鄴興之亦人亡而息無嗣續之者漢至隋垂十代凡數百年所存者黃鐘之宮一調而已十二律中唯用七聲其餘五律謂之啞鐘蓋不用故也唐太宗有知人之明善復古道故用祖孝孫張文收考正雅樂而

旋宮八十四調復見於時在懸之器方無啞者所以知
太宗之道與三五同功焉安史之亂京都為墟器之與
工十不存一所用歌奏漸多紕繆逮乎黃巢之餘工器
都盡購募不獲文記亦亡集官酌詳終不知其制度時
有太常博士商盈孫按周官考工記之文鑄鑄鐘十二
編鐘二百四十處士蕭承慶校定石磬今之在懸者是
也雖有樂器之狀殊無相應之和逮乎魏梁後唐歷晉
與漢皆享國不遠未暇及於禮樂至於十二鑄鐘不問

聲律宮商但循環而擊編鐘編磬徒懸而已絲竹匏土
僅有七聲作黃鐘之宮一調亦不和備其餘八十三調
於是乎泯絕樂之缺壞無甚於今陛下天縱文武奄宅
中區上黨一戰并胡喪氣東西二征秦吳開境大功既
著思復三代之風遺文絕編咸令遐訪隆典庶務無不
聿修宗廟朝廷之儀車服物象之數於是乎昭明遠召
樂懸親自考聽知其亡失深動上心乃命中書舍人竇
儼叅詳太常樂事不踰月調品八音初家和會以臣曾

學律歷宣示古今樂錄令臣討論臣雖不敏敢不奉詔
遂依唐法以柷黍校定尺度長九寸虛徑三分為黃鐘
之管與見在黃鐘之聲相應以上下相生之法推之得
十二律管以為衆管互吹用聲不便乃作律準十三絃
宣聲長九尺張絃各如黃鐘之聲以第八絃六尺設柱
為林鐘第三絃三尺設柱為太簇第十絃五尺三寸四
分設柱為南呂第五絃七尺一寸三分設柱為姑洗第
十二絃四尺七寸五分設柱為應鐘第七絃六尺三寸

三分設柱為蕤賓第八絃八尺四寸四分設柱為大呂
第九絃五尺六寸三分設柱為夷則第十絃七尺五寸
一分設柱為夾鐘第十一絃五尺一分設柱為無射第
十二絃六尺六寸八分設柱為中呂第十三絃四尺五
寸設柱為黃鐘之清聲十二聲中施用七聲迭為均焉
均之主者宮也徵商羽角變宮變徵次焉發其均主之
聲歸乎本音之律七聲迭應而不亂乃成其調均有七
調聲有十二均合八十四調歌奏之曲繇之出焉旋宮

之聲久絕一日而補出臣獨見恐未詳悉望下中書門
下集百官及內外知音者校其得失然後依調制八曲
十四調曲有數百見存者九曲而已皆調之黃鐘之宮
聲今詳其音數內三曲即是黃鐘宮聲其餘六曲錯雜
諸調蓋傳習之誤也唐初雖有旋宮之樂至於用曲多
與禮文相違既不敢用唐為則臣又惜學獨力未能備
究古今亦望集多聞知禮之者上本古典下順常道定
其義理於何月行何禮合用何調何曲聲數長短幾變

成議定而制曲方可久長行用所補雅樂旋宮八十四
調并所定尺所吹黃鐘管所作律準謹並上進去聖踰
遠獨學難周莫副天心空塵聖鑒疏奏帝善之乃詔尚
書省集百官詳定兵部尚書張昭等獻議曰伏覩樞密
使王朴奏太常寺樂懸鐘石不和今依古準法均調月
律十二管旋相為宮定八十四調以下太常寺教習三
十五調訖望集衆官詳議於何月行何禮用何曲調及
聲數變數欲議定而製曲者伏奉命敕據王朴所奏事

下尚書省集三省官翰林學士御史臺太常寺官員及
禮官博士等同商榷前代沿革典故并據所習新聲律
準管尺等參詳可否議定奏聞者臣等聞昔帝鴻氏之
制樂也將以範圍天地協和人神張八節之風聲測四
時之正氣氣之清濁不可以筆授聲之善否不可以口
傳故鳧氏鑄金伶倫截竹為律呂相生之管宮商正和
之音乃播之於管絃宣之於鐘石然後覆載之情訢合
陰陽之氣和同八氣從律而不姦五聲成文而不亂空

桑弧竹之韻足以禮神雲門大夏之容無虧觀德然月
律有還宮之法備於大師之職經秦滅學雅道凌夷漢
初制氏所調唯存鼓舞旋宮十二均更用之法世莫行
聞漢元帝時京房善易別音探求古義以周官均法每
月更用五音乃立準調旋相為宮成六十調又以日法
折為三百六十傳於樂府而編懸復舊律呂無差遭漢
中微雅音淪缺京房準法屢有言者事終不成錢樂空
記其名沈重但條其說六十六法寂寥不嗣梁武帝素

精音律自造四通十二笛以領八音又引古五造二變之音旋相為宮得八十四調與律準所調音同數異侯景之亂其音又絕隋朝初定雅樂羣黨沮議歷載不成而沛公鄭譯因龜茲琵琶七音以領月律五更二變七調克諧旋相為宮復為八十四調工人萬寶常又減其絲數稍令古淡隋高祖不重雅樂令儒官集議博士何妥駁奏其鄭萬所奏八十四調並廢隋代郊廟所奏唯黃鐘一均與五郊迎氣雜用蕤賓但七調而已其餘五

鐘懸而不作三朝宴樂用縵九部迄於革命未能改更
唐太宗爰命舊工祖孝孫張文收整比鄭譯寶嘗所均
七音八十四調方得絲管並懸鐘石俱奏七始之音復
振四廟之韻皆調自安史亂雜咸秦盪覆崇牙樹羽之
器掃地無餘戛擊搏拊之工窮年不嗣郊廟所奏何異
南箕波蕩不還知音殆絕臣等竊以音之所起出自人
心夔曠不能長存人事不能嘗泰人亡則音息世亂則
樂墮若不深知禮樂之情安明制作之本伏惟皇帝陛下

下心苞萬化學富三雍觀兵耀武之功已光鴻業尊祖
禮神之致尤軫皇情乃睠奉嘗痛淪樂職親閱四懸之
器思復九奏之音爰命庭臣重調鐘律臣等據樞密使
王朴條奏校京房之律法練梁武之道音考鄭譯竇嘗
之七均校孝孫文收之九變積黍累以審其度聽聲詩
以測其情依權衡嘉量之前文得備數和聲之大旨施
於鐘簾足洽簫韶臣等今月十九日於太常寺集命太
樂令賈峻奏王朴新法黃鐘調七均音律和諧不相凌

越其餘十一管諸調望依新法教習以備禮寺施用其
五郊天地宗廟社稷三朝大禮合用十二管諸調並載
唐史開元禮近代嘗行廣順中太常卿邊蔚奉勅定前
件祠祭朝會舞名舞曲歌詞寺司合有簿籍伏恐所定
曲新法曲調聲韻不協請下太常寺簡詳校試如或乖
忤請本寺依新法聲調別撰樂章舞曲令歌者誦習永
為一代之法以光六樂之書議上詔曰禮樂之重國家
所先近朝以來雅音全廢雖時運之多故亦官守之因

循遂使擊拊之音空留梗槩旋相之法莫究指歸樞密使王朴博識古今懸通律呂討尋舊典撰集新聲復六代之正音成一朝之盛事其王朴所奏旋宮新詞宜依張昭等議狀施行仍令有司依調製曲其間或有凝滯更取王朴裁酌施行先是雅音廢墜久矣累朝已來未能考正是歲將立歲仗有司以崇牙樹羽宿設于殿庭帝因親臨樂懸試其聲奏見鐘磬之類有施而不擊者訊於工師皆不能對帝甚惻然乃命翰林學士判太常

事實儼叅詳其失又命朴考正其聲朴因獻是議及以所作律准上進帝覽而稱善因命百議而行之

恭帝以顯德六年六月即位有司奏世宗廟酌獻舞定功之舞

夷樂

周官鞀鞀氏掌四夷之樂禁昧兜離是其數也詳夫納於魯廟獻於漢庭求之歷代貴亦多矣各所以象風俗和人神娛耳目者也智者審之雖夷夏不同而享樂無

異王者聲被八表德及四荒向化而來重譯而止亦符會昌之期也

周成王時命魯公世世祀周公以天子之禮樂

同之於周尊之

也魯公謂伯禽

是以魯君季夏六月以禘禮祀周公於太廟

東夷之樂也任南蠻之樂也納夷蠻之樂於太廟言廣魯於天下也

敬王時魯定公與齊景公會於夾谷

今在祝其縣

孔子攝相

事齊有司趨而進曰請奏四方之樂景公曰諾於是旌

旄羽被矛戟劍楯鼓噪而至孔子趨而進歷階而登不
盡一等舉袂而言曰吾西君為好會夷狄之樂何為於
此請命有司有司却之不去則左右視晏子與景公心
怍麾而去之

漢高祖初為漢王還伐三秦時板楯蠻為漢前鋒俗喜

歌舞

喜音虛
記切

高祖觀之曰此武王伐紂之歌也乃命樂

人習之所謂巴俞舞也

武帝時博望侯張騫入西域得胡角傳其法於西京

橫吹

雙角即胡舞也

惟得摩訶兜勒一曲李延年因胡曲更造新聲

二十八解乘輿以為樂舞

後漢以給邊和帝時萬人將軍得之魏晉以來二十解不

復具存用者有黃鳩龍頭出關入關出塞入塞折楊柳黃靈子赤之揚望行人十曲

後漢安帝永寧元年西南夷掸國王獻樂

檀音

及幻人

能吐火自支解易牛馬頭明年元會作之於庭帝與羣

臣共觀大奇之諫議大夫陳禪離席舉手曰帝王之庭

不宜作夷狄之樂尚書陳忠劾奏禪廷訕明政有詔勿

收

前涼張重華據涼州時天竺國重四譯來貢其樂樂器
有鳳首箏篪琵琶五絃笛毛圓銅鼓都曇銅鼓等九種
為一部工十二人歌曲有沙石疆舞曲有矢曲後梁呂
光既滅龜茲因得其樂樂器有豎箏篪琵琶五絃笙笛
簫簫篳篥毛圓鼓都曇鼓答臘鼓腰鼓羯鼓谿叟鼓銅鼓
具等十五種為一部工二十二人歌曲有善善摩尼解
曲婆伽兒舞曲有小天踈勒監

呂氏亡其樂亡散後魏
有中原復獲之至隋有

西應茲之號凡三部
開元中大盛於時

後魏大武既平北燕馮氏通西域得踈勒安國等樂踈
勒樂器有豎箜篌琵琶五絃笛簫觱篥答臘鼓腰鼓羯
鼓雞婁鼓十種為一部工十二人歌曲有元利死讓樂
舞曲有遠解曲有鹽曲安國樂有箜篌琵琶五絃笛簫
雙觱篥正鼓和銅鈸等簫小觱篥桃皮觱篥齊鼓擔鼓
具等十四等為一部工十八人歌曲有歌芝栖舞曲有
舞枝棲

北齊文宣愛龜茲樂每彈嘗自擊胡鼓和之後周武帝

保定五年皇后阿史那氏至自突厥得其所獲康國龜

茲等樂更雜以高昌之舊

初太祖輔魏之時高昌款附乃得其技教習以備享宴之

禮又云康國起自周閔帝聘北狄女為后得所獲西戎狄伎因得其聲樂器有笛正鼓銅鈸等為一部工七人

並於太樂習焉採用其聲被於鐘石取周官制陳之

又云

武帝聘虜女為后西域諸國來賡如龜茲踈勒康國之樂大聚長安胡兒令羯人白智通教習雜以新聲

天和六年省掖庭四夷樂

建德六年既平北齊威振海外高麗百濟二國為獻共

樂列於樂部謂之國伎

隋高祖開皇初定令置七部樂一曰國伎二曰清樂伎
三曰高麗伎四曰天竺伎五曰安國伎六曰龜茲伎七
曰文康伎又雜有疎勒扶南康國百濟突厥新羅倭國
等伎六年高昌國獻聖明樂曲帝令知音者於館所聽
之歸而肄習及客先獻於前奏之胡夷大驚

煬帝大業中平林邑國獲扶南樂工及其匏琴朴陋不

可用但以天竺轉寫其聲

又云五方師子舞獅子執子獸
出於西南夷天竺獅子等國

綴毛為之人居其中像其貌仰馴狎之容二人持繩秉
拂為習弄之狀五獅子各位其方色百四十人歌太平

樂舞拊以足持繩者服飾作崑崙狀

是時帝定清樂西京龜茲天竺康國

疎勒安國高麗禮畢以為九部樂器工衣創造既成大

備於茲矣

臣欽若等曰清樂禮畢二部中夏之樂餘七部並夷樂也

唐太宗貞觀中平高昌國收其樂付太常初高祖武德

中因隋舊制奏九部樂至是增為十部又減百濟高麗

二國盡得其樂

則天時高麗樂猶二十五曲貞元末惟能習一曲衣服亦漸失其本風矣中宗

時百濟曲工人死散闌元中岐王範為太常卿復奏置焉

中宗神龍二年三月并州清源縣尉呂元泰上疏曰比

見都邑坊市相率為渾脫駿馬胡服名為蘇莫遮非雅樂也疏奏不報

玄宗開元元年十二月勅臘月乞寒外蕃所出漸浸成俗因循已久自今已後無問蕃漢即宜禁斷乞寒者本西國外蕃之樂也中宗神龍二年并州清源縣尉呂元泰睿宗景雲二年左拾遺韓朝宗先天二年中書令張說皆上疏諫之至是乃禁

德宗貞元十六年正月南詔異牟尋作奉聖樂因西川

押雲南八國使帝臯以進帝御麟德殿以閱之

十八年正月驃國王獻樂凡一十二曲以樂工三十五人來朝其國與天竺相近故多演釋氏之詞每為曲皆齊聲唱各以兩手十指齊開齊歛為赴節之狀一低一昂未嘗不相對有類中國柘枝舞也

冊府元龜卷五百七十

欽定四庫全書

冊府元龜卷五百七十一 宋 王欽若等撰

掌禮部

討論

傳曰先王之制禮也不可多也不可寡也惟其稱也故有順有體有宜然後沿革之道殊損益之文異是以博聞強識之士司局宿業之官憤悱於函丈之下戒懼乎委巷之失詢求用捨博訪遺逸稽合乎同異折中乎今

昔蓋有意於化民成俗著誠去僞達神明之德同天地之節者矣故其周旋裼襲之數吉凶賓嘉之典弛張因襲之本法度經緯之義咸得而觀焉蓋先儒之嘉論作者之遺意於是乎在矣

孔子為魯大夫哀公問曰大禮何如君子之言禮何其尊也孔子曰丘也小人不足以知禮謙不答也君曰否吾子

言之也孔子曰丘聞之民之所繇生禮為大非禮無以節事天地之神也非禮無以辨君臣上下長幼之位也

非禮無以別男女父子兄弟之親昏姻疏數之交也君

子以此之為尊敬然

言君子以此故尊禮

然後以其所能教百姓

不廢其會節

君子以其所能於禮教百姓使其不廢此上事之期節

有成事然後

治其雕鏤文章黼黻以嗣

上事行於民有成功乃後績以治文飾以為尊卑之差

其順之然後言其喪筭備其鼎俎設其豕腊修其宗廟

歲時以敬祭祀以序宗族即安其居節醜其衣服卑其

宮室車不雕幾器不刻鏤食不貳味以與民同利昔之

君子之行禮者如此

言語也筭數也即就也醜類也幾附纏之也言君子既尊禮民以為

順乃復語以喪祭之禮就安其居處正其衣服教之節儉與之同利者上不俱足也哀公又問曰

寡人願有言然冕而親迎不已重乎已猶大也惟親迎乃服祭服孔

子愀然作色而對曰合二姓之好以繼先聖之後以為

天地宗廟社稷之主君何為已重乎先聖周公也公曰寡人

固不固焉得聞此言也寡人欲問不得其辭請少進固不

固言吾繇鄙故固也請少進欲其為言以曉已孔子曰天地不合萬物不生大

婚萬世之嗣也君何謂已重焉孔子遂言曰內以治宗

廟之禮足以配天地之神明出以治直言之禮足以立上

下之敬物耻足以振之國耻足以興之為政先禮禮其

政之本與

宗廟之禮祭宗廟也夫婦配天地有日月之象馬禮器曰君在阼夫人在房大明生於東

月生於西此陰陽之分夫婦之位也直猶正也正言謂出政教有夫婦之禮焉昏義曰天子聽外治后聽內職教順成俗外內和順國家理治此之謂盛德物猶事也事耻臣耻也振猶救也國耻君耻也君臣之行有可耻者禮足以興復之子張子貢言游侍坐於孔子縱言至於禮言

言偃子游也縱言汎說事

子曰居女三人者吾語女禮使女以禮周

流無不徧也

居女三人坐也使之坐凡與尊者言更端則起

子貢越席而對曰敢

問何如對應

子曰敬而不中禮謂之野恭而不中禮謂

之給勇而不中禮謂之逆子曰給奪慈仁

奪猶亂也巧言足恭之人

似慈仁實鮮仁特言是者感子貢也子貢辯近於給

子曰師爾過而商也不及子

產猶衆人之母也能食之不能教也

過與不及言敏鈍不同俱違禮也衆

人之母言子產慈仁多不矜莊又與子張相反子產嘗以其乘車濟冬涉者而車梁不成是慈仁以違禮子

貢越席而對曰敢問將何以為此中者也子曰禮乎禮

夫禮所以制中也

禮乎禮唯

子貢退言游進曰敢問禮

也者領惡而全好者與子曰然

領猶治也好善也

然則何如子

曰郊社之義所以仁鬼神也嘗禘之禮所以仁昭穆也

餽奠之禮所以仁死喪也射鄉之禮所以仁鄉黨也食

饗之禮所以仁賓客也

仁猶存也凡存此者所以全善之道也郊社嘗禘饋奠存死之善者

也射鄉食饗存生之善者也郊有后稷社有勾龍

子曰明乎郊社之義嘗禘之

禮治國其如指諸掌而已乎子張問政子曰師乎前吾

語女乎君子明於禮樂舉而措之而已

言禮樂足以為政也措猶施行

也子張復問子曰師爾以為必鋪几筵升降酌獻酬酢

然後謂之禮乎爾以為必行綴兆興羽籥作鐘鼓然後

謂之樂乎言而履之禮也行而樂之樂也君子力此二

者以南面而立夫是以天下太平也諸侯朝萬物服體而百官莫敢不承事矣禮之所興衆之所治也禮之所廢衆之所亂也目巧之室則有與阼席則有上下車則有左右行則有隨立則有序古之義也室而無與阼則亂於堂室也席而無上下則亂於席上也車而無左右則亂於車也行而無隨則亂於塗也立而無序則亂於位也昔聖帝明王諸侯辨貴賤長幼遠近男女外內莫敢相踰越皆繇此塗出也

服體體服也謂萬物之符長皆來為瑞應也衆之所治衆

之所以治也衆之所亂衆之所以亂也目巧謂但用巧目善意作室不踰法度猶有真詐審主之處也自目巧以上下古今常事不可廢改也三子者既得聞此言也於夫子昭然若

發蒙矣

乃曉禮樂不可廢改之意也

子夏問於孔子曰何謂三無孔

子曰無聲之樂無體之禮無服之喪此之謂三無子夏

曰三無既得畧而聞之矣敢問何詩近之

於意未察求其類於詩詩

長人之情

孔子曰夙夜其命宥密無聲之樂也威儀棣棣不

可選也無體之禮也凡民有喪匍匐救之無服之喪也

詩讀其為基聲之誤也基謀也密靜也言君夙夜謀為政教以安民則民樂之此非有鐘鼓之聲也棣棣安和

之貌也言君之威儀安和赫赫然則民做之此非有升
降揖讓之禮也救之調恤之言君於民有喪有以調恤
之則民做之此
非有衰經之服
子夏曰言則大矣美矣盛矣言盡於此

而已乎孔子曰何為其然也君子之服之也猶有五起

焉言盡於此乎意以為未盡也服猶習也君子習讀此詩起此之義其說則有五也子夏曰何

如孔子曰無聲之樂氣志不違無體之禮威儀遲遲無
服之喪內恕孔悲無聲之樂氣志既得無體之禮威儀
翼翼無服之喪施及四國無聲之樂氣志既從無體之
禮上下和同無服之喪以畜萬邦無聲之樂日聞四方

無體之禮日就月將無服之喪純德孔明無聲之樂氣

志既起無體之禮施及四海無服之喪施於孫子

不違者只

不違君之氣志也孔甚也施易也從順也畜孝也使萬邦之民競為孝就成也將大也使民之儆禮日有所成

至月則大矣宰我問三年之喪期已久矣君子三年不起猶行也

為禮禮必壞三年不為樂樂必墮舊穀既沒新穀既升

鑽燧改火期可已矣

周書月令有更火之文春取榆柳之火夏取棗杏之火季夏取柰柞

之火秋取柞櫛之火冬取槐檀之火子曰食夫稻衣夫

錦於女安乎曰安女安則為之夫君子之居喪食旨不

甘聞樂不樂居處不安故不為也今女安則為之音美也責

其無仁思於親故再言女安則為之宰我出子曰予之不仁也子生三年

然後免於父母之懷子生未三歲為父母所懷抱夫三年之喪天下

之通喪也自天子達於庶人予也有三年之愛於其父母乎言子

於父母欲報之恩昊天罔極而予也有三年之愛乎子貢問喪子曰敬為上哀次

之瘠為下顏色稱其情戚容稱其服問喪問居父母之喪也喪上哀言敬

為上者疾時尚不能敬也容戚儀也孝經曰容止可觀請問兄弟之喪子曰兄弟

之喪則有乎書策矣言疏者如禮行之未有加也齊斬之喪哀容之體經不能載矣又

子貢觀於蜡孔子曰賜也樂乎對曰一國之人皆若狂

賜未知其樂也

蜡也者索也歲十二月合聚萬物而索享之也國索鬼神而祭祀則黨正以禮

屬民而飲酒於序以正齒位於是時民無不醉者如狂矣曰未知其樂惟之也子曰百日之蜡

一日之澤非爾所知也

蜡之祭主先嗇也大飲蒸勞農以休息之言民皆勤稼穡有百

日之勞喻久也今一日使之飲酒燕樂是君之恩澤非爾所知言其義大子游問喪具夫子

曰稱家之有亡子游曰有無惡乎齊惡乎齊問夫子曰

有毋過禮苟亡矣斂首足形

形體還葬還之言便也言已

縣棺而封

不設碑綽不備禮封當為窆窆下棺也

人豈有非之者哉又問

於孔子曰喪慈母如母禮與

如母謂父卒三年也子游意以為國君亦然禮所云

者乃大夫以下父所使妾養妻子

孔子曰非禮也古者男子外有傅內有

慈母君命所使教子也何服之有

言無服也此指謂國君之子也大夫士子

為庶母慈已者服小功父卒乃不服

昔者魯昭公少喪其母有慈母良及

其死也公弗忍也欲喪之有司以聞曰古之禮慈母無

服據國君也良善也謂之慈母故為其善國君之妾子

於禮不服也昭公年三十乃喪齊歸猶無感容是不

少又安能不忍於慈母此非昭公明矣未知何公也今也君為之服是逆古之禮而亂國法也若終行之則有司將書之以遺後世無乃

不可乎公曰古者天子練冠以燕居公弗忍也遂練冠

以喪慈母自魯昭公始也

公之言又非也天子練冠以燕居蓋謂庶子王為其母

曾子問曰卿大夫將為尸於公受宿矣而有齊衰內喪

則如之何孔子曰出舍乎公館以待事禮也

吉凶不可同處

又問曰竝有喪如之何何先何後

竝謂父母若親同者同月死

孔子

曰葬先輕而後重其奠也先重而後輕禮也自啟及葬

不奠

不奠務於當葬者

行葬不哀次

不哀次輕於在殯者

反葬奠而後辭

於殯遂脩葬事

殯當為賓聲之誤也辭於賓謂告將葬啟期也

其虞也先重而

後輕也孔子曰宗子雖七十無無主婦

族人之婦不可無統

非宗

子雖無主婦可也又問曰將冠子冠者至揖讓而入聞

齊衰大功之喪如之何

冠者賓及贊者

孔子曰內喪則廢外喪

則冠而不醴徹饌而埽即位而哭如冠者未至則廢

內喪

同門也不醴不醴子也其廢者喪以成服因喪而冠

如將冠子而未及期日而有

齊衰大功小功之喪則因喪服而冠

廢吉禮而因喪冠俱成人之服及至

也除喪不改冠乎孔子曰天子賜諸侯大夫冕弁服於

太廟歸設奠服賜服於斯乎有冠醮無冠醴

酒為醮冠禮醴重而

醜輕此服賜服酌用酒尊賜也
不醜明不改冠改冠當醜也

父沒而冠則已冠埽地

而祭於禩已祭而見伯父叔父而後饗冠者

饗謂禮之

又問

曰祭如之何則不行旅酬之事矣孔子曰聞之小祥者

主人練祭而不旅奠酬於賓賓弗舉禮也

奠無尸虞不致爵小祥不

旅酬大祥無筭爵彌吉也

昔者魯昭公練而舉酬行旅非禮也孝公

大祥奠酬弗舉亦非禮也

孝公隱公之祖父

又問曰小功可以

與於祭乎

祭謂虞祭哭時

孔子曰何必小功耳自斬衰以下與

祭禮也曾子曰不以輕喪而重祭乎

恠使重者執事

孔子曰天

子諸侯之喪祭也不斬衰者不與大夫齊衰者與祭士

祭不足則取於兄弟大功以下者又問曰相識有喪服

可以與於祭乎

問已有喪服可以助相識者祭否

孔子曰總不祭又何

助於人又問曰廢喪服可以與於饋奠之事乎

謂新除喪服也

孔子曰說衰與奠非禮也

執事於人之神為其志哀疾也

以擯相可也

又問曰昏禮既納幣有吉日女之父母死則如之何

吉日

取女之吉日孔子曰壻使人弔如壻之父母死則女之家亦

使人弔

必使人弔者未成兄弟

父喪稱父母喪稱母

禮宜各以其敵者也父使

人弔之辭云某子聞某之喪某子使某如何不淑母則若云宗蕩伯姬聞姜氏之喪伯姬使某如何不淑凡弔

辭一父母不在則稱伯父母弔禮不可廢也伯父母耳又不在則稱叔父母

已葬壻之伯父致命女氏曰某之子有父母之喪不得

嗣為兄弟使其致命女氏許諾而弗敢嫁禮也必致命者不敢

以累年之喪使人失嘉會之時壻免喪女之父母使人請壻弗取而後

嫁之禮也請請成昏女之父母死壻亦如之女免喪壻之父母亦使人請其

已葬時而致命又問曰親迎女在塗而壻之父母死如之何孔

子曰女改服布深衣縞總以趨喪布深衣縞總婦人始喪未成服之服女

在途而女之父母死則女反

奔喪服期

如壻親迎女未至而

有齊衰大功之喪則如之何孔子曰男不入改服於外

次女入改服於內次然後即位而哭

不聞喪即改服者昏禮重於齊衰以

下又問曰除喪則不復昏禮乎

復猶償也

孔子曰祭過時不

祭禮也又何反於初

重喻輕也同牢及饋享相飲食之道

又問曰女未廟

見而死則如之何孔子曰不遷於祖不附於皇姑壻不

杖不菲不次歸葬於女氏之黨示未成婦也

遷朝廟也壻雖不備

喪禮猶為之服齊衰也

又問曰取女有吉日而女死如之何孔子

曰壻齊衰而弔既葬而除之夫死亦如之

未有期三年之恩也女服

斬衰

又問曰古者師行必以遷廟主行乎孔子曰天子巡

守以遷廟主行載於齊車言必有尊也今也取七廟之

主以行則失之矣

齊車金路

當七廟五廟無虛主虛主者惟

諸侯薨與去其國與祫祭於祖為無主耳吾聞諸老聃

曰國君薨則祝取羣廟之主而藏諸祖廟禮也卒哭成

事而後主各反其廟

老聃古壽老者之號也與孔子同時藏諸主於祖廟象有凶者聚也

卒哭成事先

君去其國太宰取羣廟之主以從禮也

鬼神

依人者也 禘祭於祖則祝迎四廟之主

祝接神者也

主出廟入廟

必蹕

蹕止行者

又問曰古者師行無遷主則何主孔子曰主

命問曰何謂也孔子曰天子諸侯將出必以幣帛皮圭

告於祖禰遂奉以出載於齊車以行每舍奠焉而後就

舍

以脯醢禮神乃敢即安也所告而不以出即埋之

反必告設奠卒歛幣玉藏

諸兩階之間乃出蓋貴命也又問曰諸侯旅見天子入

門不得終禮廢者幾

旅衆

孔子曰請問之曰太廟火日食

后之喪雨霑服失容則廢

太廟始祖廟宗廟皆然主於始祖耳

如諸侯皆

在而日食則從天子救日各以其方色與其兵

示奉時事有所

討也方色者東方衣青南方衣赤西方衣白北方衣黑兵未聞也

太廟火則從天子救

火不以方色與兵又問曰當祭而日食大廟火其祭也

如之何孔子曰接祭而已矣如牲至未殺則廢

接祭而已不迎

也又問曰三年之喪弔乎孔子曰三年之喪練不羣立

不旅行

為其苟語忘哀也

君子禮以飾情三年之喪而弔哭不

亦虛乎

為彼哀則不專於親也為親哀則是妄弔

曾子問曰大夫有私喪可

以除之矣而君有服焉其除之也如之何孔子曰有君

喪服於身不敢私服又何除焉

重喻輕也私喪家之喪也喪服四制曰門外之

治義斷恩

於是乎有過時弗除也君之喪服除而後殷祭禮

也謂主人也

夫子則否

又問曰父母之喪弗除可乎

以其有終身之憂 孔

子曰先王制禮過時弗舉禮也非弗能勿除也患其過

於制也故君子過時不祭禮也

言制禮以為民中過其時則不成禮也

又

問曰父母之喪既引及塗聞君薨如之何孔子曰遂既

封改服而往

封當為窆改服括髮徒跣布深衣扱上衽不以私喪包至尊

又問曰宗

子為士庶子為大夫其祭也如之何孔子曰以上牲祭

於宗子之家

貴祿重宗也上牲大夫少牢

祝曰孝子某為介子某薦

其嘗事

介副也 不言庶使若可以祭然

若宗子有罪居於他國庶子為

大夫其祭也祝曰孝子某使介子某執其常事

此之謂宗子攝

夫攝主不厭祭不旅不假不綏祭不配

皆辟正主厭厭鈇神也 厭有陰

有陽迎主之前祝酌奠奠之且饗是陰厭也尸祭之後徹薦俎敦設於西北隅是陽厭也此不厭者不陽厭也

不旅不旅酬也假讀為嘏不嘏不嘏主人也不綏祭謂今主人也綏周禮作墮不配者祝辭不言以某妃配某

氏布奠於賓賓奠而不舉

布奠謂主人酌賓奠解於薦北賓奠謂取解奠於薦南也

此酬之始也奠之不舉止旅

不歸肉

肉俎也謂與祭者留之共燕

其辭於賓曰宗

兄宗弟宗子在他國使某辭

辭猶告也宿賓之辭與宗子為列則曰宗兄若宗弟

昭穆異者曰宗子而已其辭若云宗兄某在他國使某執其常事使某告

又問曰宗子在他

國庶子無爵而居者可以祭之乎孔子曰祭

有子孫存不可以之

先祖請問其祭如之何孔子曰望墓而為壇以時祭

於廟無爵者賤遠辟正主

若宗子死告於墓而後祭於家

言祭於家若無廟也

宗子死稱名不言孝

孝宗子之稱不敢與之同其辭但言子某薦其常事

身沒而

已

至子可稱孝

子游之徒有庶子祭者以此

以用也用此禮祭也

若義

也若順今之祭者不首其義故誣於祭也

首本也誣猶妄也

又問

曰祭必有尸乎

言無益無用為

若厭祭亦可乎

厭時無尸

孔子曰祭

成喪者必有尸尸必以孫孫幼則使人抱之無孫則取

於同姓可也

人以有子孫為成人子不殤父義繇此也

祭殤必厭蓋弗成也

厭飫而已不成其為人

祭成喪而無尸是殤之也

與不成人同

孔子曰

有陰厭有陽厭

言祭殤之禮有於陰厭之者有於陽厭之者

曾子問曰殤不

祔祭何謂陰厭陽厭

祔當為備聲之誤也言殤乃不成人祭之不備禮而云陰厭陽厭乎

此失孔子之指也祭成人始設奠於與迎尸于前謂之陰厭尸設之後改饌於西北隅謂之陽厭殤則不備

孔子曰宗子為殤而死庶子弗與後

族人以其倫代之明不序昭穆立之

廟其祭之就其祖而已代之者主其禮

其吉祭特牲

尊宗子從成人也凡殤則特豚自卒哭成

事之後

祭殤不舉無所俎無玄酒不告利成

此其無尸及所降也

其它如成人舉肺脊肝俎利成禮之始於尸者

是謂陰厭

是宗子而殤祭之於奧之禮小宗為殤其

祭禮亦如之

凡殤與無後者祭於宗子之家當室之白尊於

東房是謂陽厭

凡殤謂庶子之適也或昆弟之子或從父昆弟無後者如有昆弟及諸父此則

今死者皆宗子大功之內親共祖禰者言祭於宗子之家者為有異居之道也無廟者為禫祭之親者共其牲物宗子皆主其禮當室之白尊於東房異於宗子之為殤當室之白謂西北隅得戶明者曰陽凡祖廟在小宗之家小宗祭之亦然宗子之適亦為凡殤過此以往則不祭也祭適者天子下祭五諸侯下祭三大夫下祭二

士以下祭
子而止

又問曰葬引至於壙日有食之則有變乎且

不乎孔子曰昔者吾從老聃助葬於巷黨及壙日有食

之老聃曰丘止柩就道右止哭以聽變既明反而後行

曰禮也

巷黨黨名也就道右者行
相左變日食也反復也

反葬而丘問之曰夫

柩不可以反者也日有食之不知其已之遲數則豈如

行哉

已止也數
讀為速

老聃曰諸侯朝天子見日而行逮日而

舍奠大夫使見日而行逮日而舍

舍奠每將
舍奠行主

夫柩不蚤

出不莫宿

侵晨夜則
近姦寇

見星而行者唯罪人與奔父母之

喪者乎日有食之安知其不見星也

為無日而慝作豫止也

且君

子行禮不以人之親痞患

痞病也以人之父母行禮而恐懼其有患害不為也

吾

聞諸老聃云又問曰為君使而卒於舍禮曰公館復私

館不復凡所使之國有司所授舍則公館已何謂私館

不復

復始死招竟

孔子曰善乎何之也

善其問難明也

自卿大夫士

之家曰私館公館與公所為曰公館公館復此之謂也

公館若今縣官館也公所為君所命使舍已者

又問曰下殤土周葬於園遂與

機而往塗邇故也

土周聖周也周人以夏后氏之聖周葬下殤於園中以其去成人遠不就

墓也。撻，輿尸之牀也。以繩縛其中央，又以繩從兩旁而鈎之，以機舉尸，輿之以就園而斂。葬馬途近，故耳。今

墓遠，則其葬也如之何。

今人斂下殤於宮中而葬於墓，與成人同墓，乃途遠其葬堂與

其棺乎載之也。問禮之變也。

孔子曰：吾聞諸老聃曰：昔者史佚有子

而死，下殤也。墓遠，

蓋欲葬墓如長殤，從成人也。長殤有送葬車者，則棺載之矣。史佚，成王時

賢史也。贊猶有所不知。

召公謂之曰：何以不棺斂於宮中。

欲其斂於宮中。

如成人也。斂於宮中，則葬猶當載之。

史佚曰：吾敢乎哉。

畏知禮也。

召公言於周

公為史周，公曰：豈不可。

言是豈於禮不可不許也。

使佚行之。

失指以為許也。

遂用召公之言。

下殤用棺衣棺，自史佚始。

棺謂斂於棺。

公儀仲子之

喪檀弓免焉

故為非禮以非仲子也禮朋友皆在他邦乃袒免

仲子舍其孫而立

其子

此其所立非也公儀蓋魯同姓同禮適子死立適孫為後

檀弓曰何居我未之

前聞也

居讀為姬姓之姬齊魯之間語助也前猶故也

趨而就子服伯子於門

右曰仲子舍其孫而立其子何也

去賓位就主人兄弟之賢者而問之子服

伯子蓋仲孫蔑之玄孫子服景伯蔑魯大夫

伯子曰仲子亦繇行古之道也

昔者文王舍伯邑考而立武王微子舍其孫肅而立衍

也夫仲子亦猶行古之道也

伯子為親者隱耳立子非也文王立武王權也微子

適子死立其弟衍殷禮也

子游問諸孔子孔子曰否立孫

據周禮

言偃吳人字子游有子與子游立見孺子慕者有子謂

子游曰予壹不知夫喪之踊也予欲去之久矣情在於斯

其是也夫

喪之踊猶孺子之號慕

子游曰禮有微情者

節哭踊

有以

故興物者

衰經之制

有直情而徑行者戎狄之道也

哭踊無節衣服

無禮道則不然

與戎狄異

人喜則斯陶

陶鬱陶也

陶斯咏

咏謳也

斯猶

猶當為搖聲之誤也搖謂身動搖也秦人猶搖聲相近

猶斯舞

手舞也

舞斯愠

愠怒也

愠斯戚

戚憤也

戚斯歎

歎吟也

歎斯辟

辟拊心也

辟斯踊矣

踊品節斯斯之謂禮

舞踊皆有節乃成禮

人死斯惡之矣無能也

斯倍之矣

無能謂心之無所復能

是故制絞衾設婁娶為使人勿

惡也

絞衾尸之飾婁娶棺之塙飾周禮婁作柳

始死脯醢之奠將行遣而行

之既葬而食之

將行將葬也葬有遣奠食反虞之祭

未有見其饗之者

也自上世以來未之有舍也為使人勿倍也

舍廢也

故子

之所刺於禮者亦非禮之訾也

訾病也

又公叔木有同母

異父之昆弟死問於子游

木當為朱春秋作成衛公叔文子之子定公十四年奔魯

游曰其大功乎

疑所服也親者屬大功是

卜商字子夏狄儀有同母異父之昆弟死問於子夏子夏

曰我未之前聞也魯人則為之齊衰狄儀行齊衰今之

齊衰狄儀之問也又孔子之喪有自燕來觀者舍於子

夏氏子夏曰聖人之葬人與人之喪聖人也子何觀焉

與及也昔者夫子言之曰吾見封之若堂者矣封築土為壘堂形四

方而高見若坊者矣坊形旁殺平上而長見若覆夏屋者矣覆謂茨瓦也夏

屋今之門廡也其形旁廣而卑見若斧者矣斧形旁殺刃上而長從若斧者焉孔子

以為刃上難登狹又易為功馬鬣封之謂也俗間名今日而三斬板

而已封板蓋廣二尺長六尺斬板謂斷莫縮也三斷止之旁殺蓋高四尺其廣衰未聞也詩云縮板以

載尚行夫子之志乎哉

高庶幾也

衛司徒敬子死

司徒官氏公子許之

後子夏弔焉主人未小歛經而往子游弔焉主人既小

歛子游出經反哭

皆以朋友之禮往而二人異

子夏曰聞之也與曰

聞諸夫子主人未改服則不經

魯子名參南武城人也有子問於魯子曰問喪於夫子

乎

有子孔子弟子有若也夫子卒後問此庶有異聞也喪謂仕失位也魯昭公孫于齊曰喪人其何稱曰

聞之矣喪欲速貧死欲速朽有子曰是非君子之言也

貧朽非人所欲

魯子曰參也聞諸夫子也有子又曰是非君子

之言也。曾子曰：參也。與子游聞之，有子曰：然，然則夫子

有為言之也。曾子以斯言告於子游，子游曰：甚哉有子

之言，似夫子也。昔者夫子居於宋，見桓司馬，自為石椁

三年而不成。桓司馬，宋向戌之孫，名魋。夫子曰：若是其靡也，死不如

速朽之愈也。死之欲速朽，為桓司馬言之也。靡，侈也。南宮敬

叔反必載寶而朝。敬叔，魯孟僖子之子仲孫閱，蓋嘗失位去魯，得反載寶來朝於其君。夫

子曰：若是其貨也，喪不如速貧之愈也。喪之欲速貧，為

敬叔言之也。曾子以子游之言告於有子，有子曰：然，吾

固曰非夫子之言也。曾子曰：子何以知之？有子曰：夫子

制於中都，四寸之棺，五寸之槨，以斯知不欲速朽也。中都

魯邑名也。孔子嘗為之宰，為民作制。孔子繇中都宰，為司空，繇司空為司寇。昔者夫子失魯

司寇，將之荆。將應聘於楚。蓋先之以子夏，又申之以冉有，以

斯知不欲速貧也。言汲汲於仕得祿。仲憲言於曾子曰：夏后

氏用明器，示民無知也。所謂致死之仲憲。孔子弟子原憲。殷人用祭器

示民有知也。所謂致生之。周人兼用之，示民疑也。言使民疑於無知與有知。

曾子曰：其不然乎？其不然乎？非其說之非也。夫明器，鬼器也。祭

器人器也夫古之人胡為而死其親乎

言仲憲之言三者皆非此或用

鬼器或用人器

魯申問於魯子曰哭父母有常聲乎曰中路嬰兒

失其母焉何常聲之有

嬰猶驚彌也言其若小兒亡母啼號安得常聲乎所謂哭不哀

穆公之母卒

穆公魯哀公之曾孫

使人問於魯子曰如之何

問居喪之

禮曾子曾參之子名申

對曰申也聞之申之父曰哭泣之哀齊斬

之情饘粥之食自天子達

子喪父母尊卑同

有子名若魯人曾子曰晏子可謂知禮也已恭敬之有

焉

言禮者敬而已矣

有若曰晏子一狐裘三十年遺車一乘及

墓而反國君七個遣車七乘大夫五个遣車五乘晏子

馬知禮

言其大儉偏下非之及墓而反言其既窆則歸不留賓有事也人臣賜車馬者乃得有遣車遣

車之差大夫五諸侯七天子九諸侯不以命數喪數畧也个謂所包遣奠牲體之數也雜記曰遣車示牢具

仲梁子魯人也曾子曰尸未設飾故帷堂小斂而徹帷

仲梁子曰夫婦方亂故帷堂小斂而徹帷

斂者動搖尸帷堂為人褻

之言方亂非也仲梁子魯人也

或問於曾子曰夫既遣而包其餘猶既食而裹其餘與

君子既食則裹其餘乎

言遣既奠而又包之是與食於人已而裹其餘將去何異與君

子寧為是乎
言傷庶也

曾子曰吾子不見大饗乎夫大饗既饗卷

三牲之俎歸於賓館父母而賓客之所以為哀也子不

見大饗食乎

既饗歸俎所以厚之也言父母家之主今賓客之是孝子哀親之去也

又小歛

之奠子游曰於東方曾子曰於西方歛斯席矣

曾子以俗說非

又大歛奠於堂乃有席

小歛之奠在西方魯禮之末失也

末世失禮之為

縣子魯人也陳莊子死赴於魯魯人欲勿哭

君無哭隣國大夫之

禮陳莊子齊大夫陳恒之孫名伯

繆公召縣子而問焉縣子曰古之大

夫束脩之問不出境雖欲哭之安得而哭之

以其不外交今

之大夫交政於中國雖欲勿哭焉得而弗哭

言時君弱臣強政在

大夫專盟會以交接

且臣聞之哭有二道有愛而哭之有畏而哭

之以權微勸之

公曰然然則如之何而可縣子曰請哭諸異

姓之廟

明不當哭

於是與哭諸縣氏

子思孔子孫伯魚之子也曾子謂子思曰伋吾執親之

喪也水漿不入於口者七日

言已以疾時禮而不如此

子思曰先王

之制禮也過之者俯而就之不至焉者跂而及之故君

子之執親之喪也水漿不入於口者三日杖而後能起

為曾子言難
繼以禮抑之

柳若衛人也子思之母死於衛

伯魚卒其妻嫁於衛

柳若謂子思

曰子聖人之後也四方於子乎觀禮子蓋慎諸

見子思欲為嫁

母服恐其失禮戒之嫁母齊衰期

子思曰吾何慎哉吾聞之有其禮無

其財君子弗行也

謂時可行而財不足以備也

有其禮有其財無其

時君子弗行也

謂財足以備禮而時不得行者

吾何慎哉

時所止則止時所行則行

無所疑也喪之禮如子贈祔之屬不踰主人

冊府元龜卷五百七十一

欽定四庫全書

冊府元龜卷五百七十二 宋 王欽若等 撰

掌禮部

討論第二

魏蔣濟為太尉初侍中高堂隆論郊祀事以魏為舜後推
舜配天濟以舜本姓媯其苗曰田非曹之先著文以追詰
隆及與尚書繆襲往反竝有理據又難鄭玄注祭法云有
虞以上尚得禘郊祖宗配用有德自夏已下稍用其姓氏

濟曰夫蚪龍神於獭獭自祭其先不祭蚪龍也麒麟白虎
仁於豺豺自祭其先不祭麟虎也如玄之說虞已上豺獭
之不若邪臣以為祭法所云見疑學者久矣鄭玄不考正
其違而就通其義

吳張昭弱冠察孝廉不就汝南主簿應劭議宜為舊君諱
論者皆互有異同事在風俗通昭著論曰客有見大國之
議士君子之論云起元建武已來舊君名諱五十六人以
為後生不得協也取乎經論譬諸行事義高辭麗甚可嘉

美愚意褊淺切有疑焉蓋乾坤刻分萬物定形肇有父子
君臣之經故聖人順天之性制禮尚敬在三之義君實食
之在喪之哀君親臨之厚莫重焉恩莫大焉誠臣子所尊
仰萬夫所天恃焉得而同之哉然親親有等尊尊有殺故
禮服上不盡高祖下不盡玄孫又傳記四世而總麻服之
窮也五世袒免殺同姓也六世而親屬竭矣又曲禮有不
建事之義則不諱者蓋名之謂屬絕之義不拘於協况乃
古君五十六哉邾子會盟季友來歸不稱其名咸書字者

是時魯人嘉之也何解臣子為君父諱乎周穆王諱滿至
定王時有王孫滿者其為大夫是臣協君也又厲王諱胡
及莊王之子名胡其比衆多夫類事建議經有明據傳有
徵案然後進攻退守萬無奔北垂示百世永無咎失今應
劭雖上尊舊君之名而下無所斷齊猶歸之疑云曲禮之
篇疑事無質觀省上下闕義自證文辭可謂倡而不法將
來何觀言聲一放猶拾藩也過辭在前悔其何追又云昭
與王朗共論舊君諱事州里才士陳琳等皆稱善之

晉蔡謨為太常康帝建元元年太史上元日合朔後復
疑應却會與否庾冰輔政寫劉邵議以示八座於時有
謂邵為不得禮意苟或從之是勝人之一失謨遂著議
非之曰邵論災消異伏又以梓慎裨竈猶有錯失太史
上言亦不必審其理誠然也云聖人垂制不為變異預
廢乎禮此則謬矣災祥之發所以謹告人君王者之所
重誠故素服廢樂退避正寢百官降物用幣伐鼓躬親
而救之夫敬誠之事與其疑而廢之寧慎而行之故孔

子老聃助葬於巷黨以喪不見星而行故日蝕而止柩
曰安知其不見星也而邵廢之是棄聖賢之成規也魯
桓公壬申有災而以乙亥嘗祭春秋譏之災事既過猶
追懼未已故廢宗廟之祭况聞天青將至行慶樂之會
於禮乖矣禮所云諸侯入門不得終禮者謂日官不豫
言諸侯既入見蝕乃知耳非先聞當蝕而朝會不廢也
引此可謂失其義旨劉邵所執者禮記也夫子老聃巷
黨之事亦禮記所言復違而反之進退無據然苟令

所言漢朝所從遂使此言至今見稱莫知其誤矣後君子將擬以為式故正之云爾於是冰從衆議遂以却會至永和中殷浩輔政又欲從劉邵議不却會王彪之據咸寧建元故事又曰禮云諸侯旅見天子不得終禮而廢者四自謂卒暴有之非為先存其事而僥倖史官推行謬錯故不豫廢朝禮也於是又從彪之議

宋傅亮為中書令時御史中丞蔡廓疑揚州刺史廬陵王義真朝堂班次亮與廓書曰揚州自應著刺史服耳

然謂坐起班次應在朝堂諸官上不應依官次坐下足下試更尋之詩序云王姬下嫁於諸侯衣服禮秩不係其夫下王后一等推王姬下王后一等則皇子居然在王公之上陸士衡起居注式乾殿集諸皇子悉在三司上今抄疏如別又海西即位赦文太宰武陵王第一撫軍將軍會稽王第二大司馬第三大司馬位既最高又都督中外而次在二王之下豈非下皇子耶此文今具在也永和中蔡公為司徒司馬簡文為撫軍開府對錄朝

政蔡為正司不應反在儀同之下而於時位次相王在前蔡公次之耳諸例甚多不能復具疏揚州反乃居卿尹之下恐此失禮宜改之也廓答曰揚州位居卿尹之下嘗亦為疑然朝廷以位相次不以本封復無明文云皇子加殊禮齊獻王為驃騎孫秀來降武帝欲優異之以秀為驃騎轉齊王為鎮軍在驃騎上若如足下言皇子便在公右則齊王本以自尊何改鎮軍令在驃騎上明知故依見位為次也又齊王為司空賈充為太尉俱

錄尚書署事嘗在充後潘正叔奏公羊事於時三錄梁
王彤為衛將軍署在太尉隴西王泰司徒王玄冲下近
太元初賀新宮成司馬太傅為中軍而以齊王柔之為
賀首立安帝為太子禮徐邈為郎位次亦以太傅在
諸王下又謁李太后宗正尚書符令以高密王為首時
王東亭僕射王徐皆是近世識古今者足下引式乾公
王吾謂未可為據其云上出式乾古傳中彭城王植荀
組潘岳嵇紹杜斌然後道足下所疏四王在三司之上

反在黃門郎下有何義且四王之下則云大將軍梁王
彤車騎趙王倫然後云司徒王戎耳梁趙二王亦是皇
子屬尊位齊在豫章王常侍之下又復不通蓋書家指
疏時事不必存其班次式乾亦是私宴異於朝堂如
今含章西堂足下在僕射下侍中在尚書下耳來示又
云曾祖與簡文對錄位在簡文下吾家故事則不然今
寫如別王姬身無爵位故不得不從夫而以王女為尊
皇子出任則有二位二位則依朝復示之班序唯引太

和赦文差可為言然赦文前後亦參差不同太宰上公自應在大司馬前耳簡文雖撫軍時已授丞相殊禮又中外都督故以本任為班不以督中外便在公右也今護軍總方伯而位次故在持節都督下足下復思之

建平王宏為左僕射孝武建武元年六月湘東國太妃以去三十年閏六月二十八日薨未詳周忌當在六月為取七月未詳服勅禮官議正博士丘邁之議案吳商議閏月亡者應以本正之月為忌謂正閏論雖各有所

執商議為允宜以今六月為忌宏謂邁之議不可准據
按晉世及皇代以來閏月亡者以閏之後月祥宜以來
七月為祥忌

南齊王儉為尚書左僕射時竟陵王子良母太妃以七
月薨子良以八月奉凶問及小祥疑南郡王應相待儉
議以為禮有倫序義無徒設如今遠則不待近必相須
禮例既乖即心無取若疑兄弟同居吉凶雜則遠還之
子自應開立別門以終喪事靈筵祭奠隨在家之人再

暮而毀庶子在家亦不待嫡而况諸妃正體臺中軍長
奠之重天朝又行權制進退彌復非疑謂應不相待中
軍繚縞之日聞喜致哀而已不受弔慰至聞喜變除昆
弟亦宜相就寫情不對客從之

後魏裴延雋宣武時為司州別駕加鎮遠將軍及詔立
明堂羣官博議延雋獨著一堂之論太傅清河王懌時
典衆議讀而笑曰子故欲遠符僕射也

李謚涿郡人少好學博通諸經覽考工記大戴禮盛德

篇以明堂之制不同遂著明堂制度論曰余謂論事辨物當取正於經典之真文援證定疑必有驗於周孔之遺訓然後可以稱準的矣今禮文殘缺聖言靡存明堂之制誰使正之是以後人紛糾競興異論五九之說各信其習是非無準得失相半故歷代紛紜靡所取正乃使裴頠云今羣儒紛糾互相掎摭就令其象可得而圖其所以居用之禮莫能通也為設虛器耳况漢氏所作四維之个復不能令各處其辰愚以為尊祖配天

其義明著廟宇之制理據未分直可為殿屋以宗嚴父
之祀其餘雜碎一皆除之斯豈不以羣儒舛互竝乘其
實據義求衷莫適可從哉但恨典文殘滅求之靡據而
已矣乃復遂去室牖諸制施之於教未知其所隆政求
之於情未可喻其所以必須惜哉言乎仲尼有言曰賜
也爾愛其羊我愛其禮余以為隆政必須其禮豈彼一
羊哉推此而論則聖人之於禮殷勤而重之裴顏之於
禮任意而忽之是則顏賢於仲尼矣以斯觀之裴氏子

以不達而失禮之旨也余切不自量頗有鄙意據理尋
義以求其真貴合雅衷不苟偏信乃藉之以紀傳考之
以訓注博採先賢之言廣搜通儒之說量其當否參其
同異棄其所短收其所長推義察圖以折厥衷豈敢必
善聊亦合其言志矣凡論明堂之制者雖衆然較其大
畧則二途而已言五室者則據周禮考工之記以為本
是康成之徒所執言九室者則按大戴盛德之篇以為
源是伯喈之論所持此之二書雖非聖旨然是先賢之

中博見洽通者也但各記所聞未能全正盡美未盡善也然先儒不能考其當否便各是所習卒相非毀豈達士之確論哉小戴氏傳禮事四十九篇號曰禮記雖未能全當然多得其衷方之前賢亦無愧矣而月令玉藻明堂三篇頗有明堂之義余故採掇二家參之月令以為明堂五室古今通則其室居中者謂之太室當太室之東者謂之青陽當太室之南者謂之明堂當太室之西者謂之總章當太室之北者謂之玄堂四面之室各有夾

房謂之左右个三十六戶七十二牖矣室个之形今之
殿前是其遺像耳个者即寢之房也但明堂與寢施用既
殊故房个之名亦隨事而遷耳今粗書其像以見鄙意
按圖察義畧可驗矣故簡之五室則義明於考工較之
戶牖則數叶於盛德考之施用則事著於月令求之閏
也合周禮與玉藻既同夏殷又符周秦雖乖衆儒儻或
在斯矣考工記曰周人明堂度以九尺之筵東西九筵
南北七筵堂崇一筵五室凡室二筵室中度以几堂上度以

筵余謂記得之於五室而謬於堂之脩廣何者當以理推之令愜古今之情也夫明堂者蓋所以告月朔布時令宗文王祀五帝者也然營構之範自當因宜創制耳故五室者合於五帝各居一室之義且四時之祀皆據其方之正又聽朔布令咸得其月之辰可請施政及記二三得允求之古義竊為當矣鄭康成漢末之通儒後學所宗正釋五室之位謂土居中木火金水各居四維然四維之室既乖其正施令聽朔各失厥衷左右

之个棄而不顧乃反文之以美說飾之以巧辭言水木
用事交於東北木火用事交於東南金火用事交與西
南金水用事交於西北既以依五行當從其用事之交
出何經典可謂攻於異端言非而博疑誤後學非所望
於先儒也禮記玉藻曰天子聽朔於南門之外閏月則
闔門左扉立於其中鄭玄注曰天子之廟及路寢皆如
明堂制明堂在國之陽每月就其時之堂而聽朔焉卒
事及宿路寢亦如之閏月非常月也聽其朔於明堂中

門還處路寢閏終月也而考工記周人明堂玄注曰或舉王寢或舉明堂互之以明其制同也其制同之言皆出鄭注然則明堂與寢不得異矣而尚書顧命篇曰迎于釗於南門之外延入翼室此之翼室即路寢矣其下曰大貝賁鼓在西房垂之竹矢在東房此則路寢有左右房見於經史者也禮記喪大記曰君夫人卒於路寢小斂婦人髻帶麻於房中鄭玄注曰此蓋諸侯禮帶麻於房中則西房也天子諸侯有左右房見於注者也諸路寢則列

其左右房言明堂則闕其左右个同制之說還相矛盾
通儒之注何其然乎使九室之徒奮筆而爭鋒者豈不
踈處室之不當哉記云東西九筵南北七筵五室凡室二筵
置五室於斯堂雖使班倭構思王爾營度亦不能令三室不
居其南北也然則三室之間使居六筵之地而室壁之
外裁有四尺五寸之堂焉豈有天子布政施令之所宗
祀文王以配上帝之堂周公負辰以朝諸侯之處而室
戶之外僅餘四尺而已哉假在儉約為陋過矣論其堂

宇則偏而非制求之道理則未愜人情其不然一也余恐為鄭學者苟求必勝競生異端以相訾抑云二筵者乃室東西耳南北則挾焉余故備論之曰若東西二筵則室戶之外為丈三尺五寸矣南北戶外復如此則三室之中南北各丈二尺耳記云四房兩夾窓若為三尺之戶二尺之窓窓戶人之明裁盈一尺繩樞瓮牖之室葦門圭竇之堂尚不然矣假令復欲小廣之則四面之外闊狹不齊東西既深南北更淺屋宇之制不為通矣駭

之衆塗畧無筭焉且凡室二筵丈八地耳然則戶牖之間不踰二尺也禮記明堂天子負斧扆南向而立鄭玄注曰設斧扆於戶牖之間而鄭氏禮圖說扆制曰縱廣八尺畫斧文於其上今之屏風也以八尺扆置二尺之間此之巨通不待智者較然可見矣且若二筵之室為四尺之戶則戶之兩頰裁各七尺耳全以置之猶不自容矧復戶牖之間哉其不然二也又復以世代驗之即虞夏尚朴殷周尚文造制之差每加崇飾而夏后世室

堂脩二七周人之制反更促狹豈是夏禹卑宮之意周
監郁郁之美哉以斯察之其不然三也又云堂崇一筵
便是基高九尺而壁戶之外裁四尺五寸於營制之法
自不相稱其不然四也又云室中度以几堂上度以筵
而復云凡室二筵而不以几還自相違其不然五也以
此驗之記者之謬抑可見矣盛德篇云明堂凡九室三
十六戶七十二牖上圓下方東西九仞南北七筵堂高
三尺也余謂盛德篇云得之於戶牖失之於九室何者

五室之制旁有夾房面各有戶戶有兩牖此乃因事立則非拘異術戶牖之數固自然矣九室者論之五帝事既不合施之時令又失其辰左右之个重置一隅兩辰同處參差出入斯乃義無所據未足稱也且又堂之修廣裁六十二尺耳假使四尺五寸為外基其中五十四尺便是五室之地計其一室之中僅可一丈置其戶牖則於何容之哉若必小而為之以容其數則令帝王側身出入斯為怪矣此匪直不合典制抑亦可哂之甚也余

謂其九室之言誠亦有繇然竊以為戴氏聞三十六戶七十二牖弗見其制靡知所置便謂一室有四戶之窓計其戶牖之數即以為九室耳或未之思也蔡伯喈漢末之時學士而見重於當時即識其脩廣之不當而必未思其九室之為謬更修而廣之假其法像可謂因偽飾詞順非而澤諒可歎矣余今省彼衆家委心從善庶探其衷不為苟異但是古非今俗間之常情愛遠惡近世中之常事而千載之下獨論古制驚俗之談固延多

謂脫有深賞君子覽而揣之儻或存焉

隋劉炫為旅騎尉吏部尚書牛弘建議以為禮諸侯絕
傍暮大夫降一等今之上柱國雖不同古諸侯比大夫
可也官在第二品宜降傍親一等議者多以為然炫駁
之曰古之仕者宗一人而已庶子不得進繇是先王重
適其宗子有分祿之義族人與宗子雖踈遠猶服縗三
月良繇受其恩也今之仕者位以才昇不限嫡庶與古
既異何降之有今之貴者多忽近親若或降之民德之

踈自此始矣遂寢其事

唐張東之聖歷初為鳳閣舍人時弘文館直學士王元感著論云三年之喪合三十六月東之著論駁之曰三年之喪二十五月不刊之典也謹按春秋魯僖公三十年十二月乙巳公薨文公二年冬公子遂如齊納幣左傳曰禮也杜預注云僖公喪終此年十一月納幣在十二月婚禮納采納徵皆有玄纁束帛諸侯則謂之納幣蓋公為太子已行婚禮故傳稱禮也公羊傳曰納幣

不書此何以書譏喪娶在三年之外何以譏三年內不圖婚何休注云僖公以十二月薨至此冬未滿二十五月納采問名納吉皆在三年之內故譏何休以公十二月薨至此冬十二月纔二十四月非二十五月是未三年而圖婚也按經書十二月乙巳公薨杜以長厯推乙巳是十一月十二日非十二月經書十二是經誤文公元年四月葬我君僖公傳曰緩也諸侯五月而葬若是十二月薨即是五月不得言緩明知是十一月薨故注

僖公喪終此年至十二月而滿二十五月故丘明傳曰禮也據此推步杜之考校豈公羊之所逮况丘明親受經於仲尼乎且二傳何杜所爭惟爭一月不爭一年其二十五月除喪繇來無別此則春秋三年之喪二十五月之明驗也尚書伊訓云成湯既沒太甲元年惟元祀十有二月伊尹祀於先王奉嗣王祗見厥祖孔安國注云湯以元年十一月殂據此則二年十一月小祥三年十一月大祥故太甲中篇云惟三祀十有二月朔伊尹

以冕服奉嗣王歸於亳是十一月大祥訖十二月朔日
加王冕服吉而歸亳也是孔言湯元年十一月之明驗
顧命云四月哉生魄王不懌是四月十六日也翌日乙
丑殂是十七日也丁卯命作冊度是十九日也越七日
癸酉伯相命士須材是四月二十五日也則成王殂至
康王麻冕黼裳中間有十日康王方始見廟則知湯殂
在十一月淹停至殮訖方始十二月祇見其祖顧命見
廟訖諸侯出廟門俟伊訓言祇見厥祖侯甸羣后咸在

則殂及見廟殷周之禮竝同此周因於殷禮損益可知
也不得元年以前別有一年此尚書三年也喪二十五
月之明驗也禮記三年問云三年之喪二十五月而畢
哀痛未盡思慕未忘然而服以是斷之者豈不送死有
已復生有節又喪服四制云變而從宜故大祥鼓素琴
告人以終又間傳云朞而小祥食菜果又朞而大祥有
醢醬中月而禫食酒肉又喪服小記云再朞之喪三年
也朞之喪二年也九月七月之喪三時也五月之喪二

時也三月之喪一時也此禮記三年之喪二十五月之
明驗也儀禮士虞禮云朞而小祥又朞而大祥中月而
禫禫是吉祭此禮周公所制則儀禮三年之喪二十五
月之明驗也此四驗者竝禮經正文或周公所制或仲
尼所述吾子豈得以禮記載聖所脩輒欲排毀漢初高
堂生傳禮記未周備宣帝時少傅后蒼因淹中孔壁所
得五十六篇著曲臺記以授弟子戴德戴聖慶溥三人
合以正經及孫卿所述竝相符會列於學官年代已久

今無端構造異論既無依據深可歎息其二十五日先
儒考校唯鄭康成注儀禮中月而禫以中月間一月自
死至禫凡二十七日又解禫云言澹澹然平安之意也
今皆二十七月復常從鄭議也踰月入禫禫既復常則
二十五日為免服二十五日二十七日其議本同竊以
子之於父母喪也有終身之痛創巨者日久痛深者愈
遲豈徒歲月而已乎故練而慨然蓋悲慕之懷未盡而
踊擗之情已歇祥而廓然者蓋哀傷之痛已除而孤邈

之念更起此皆情之所致豈外飾哉故記云三年之喪
義同過隙先王立其中制以成文理是以祥則縞帶素
紕禫則無所不佩今吾子將徇情棄禮實為乖僻夫棄
縗麻之服襲錦縠之衣行道之人皆不忍也直為節之
以禮無可奈何故繇也不能過制為姊服鯉也不能過
菽哭其母夫豈不懷懼名教逼已也至若孔鄭何杜之
徒竝命代挺生範模來齋宮牆積俛未易可窺但鑽仰
不休當漸入勝境詎勞終年矻矻虛肆莠言請所有掎

擿先儒願且以時消息時人以東之所駁頗合於禮典
顏真卿為憲部尚書肅宗復西京將還宮闕遣左司郎
中李選先行告宗廟之禮有司撰祝文稱嗣皇帝真卿
謂禮儀使崔器曰上皇在蜀稱嗣可乎器遽改之中旨
宣勞以為明儒深達禮典

冊府元龜卷五百七十二